

天水縣志

卷之十一

人物志

卷之十二

藝文志

卷之十三

藝文志

卷之十四

藝文志

天水縣志卷之十一

人物志

隴上爲河嶽根源而成紀實庖羲媧皇之故里聖門如秦子壤子石子亦皆成紀人也兼之關西出將自昔昭然賢哲挺生歷歷可數今雖勢殊時異而峙流依然鍾毓人文後先輝映或成學而稱博士或經武而樹豐功或特操出於閨閣或畸行見諸市井居常而庸德足錄遇變而大節堪風何一非足資矜式者述往事以勵將來志人物第十一

人物一

郭正謙字鶴庭湖北陸軍中學畢業辛亥武昌起義與有力焉民國三年秦州鎮馬國仁聘爲教練官勇且智國仁倚爲左右手四月初十日白匪犯城正謙建議率隊迎擊以北山爲

天水縣志

卷之十一

一

蘭州國民印刷局排印

近城要害預伏壯士部署民夫守堞然後率三百餘人從國仁出西郭迎敵進七八里斃匪數十人匪幾不支忽大股至彌山徧野國仁故魁梧混亂中爲敵射擊中彈墜馬正謙據大砲左右橫掃匪不敢縱轡正行多沿山竄伏始得護國仁回城率餘衆徐退扃門爲固守計匪衆三萬餘勢如疾風驟雨至夜伏羲城西關中城陷平明大城亦陷正謙時在鎮署療傷匪至問之答曰若未識郭教練耶司大砲者卽我也遂罵不絕口匪刃交下至死無一弱語鄉人憫而壯之爲懸壯烈如生額以誌哀哉

胡毓林字秀峯明太常少卿胡慕東十世孫也精詳明決兼具膽略壯歲經商後棄市廛家居重視公德不區區於生業襄理大城防務籌管軍械同事咸賴之甲寅四月初十日白匪攻城至次日大城陷毓林謂家人曰公局尙有未藏軍械當急往設法家人力阻之盛怒曰

全城玉石俱碎予一人何足惜逕奔往遂遇害於公局門右是時殉難者三百餘人紳耆青衿東關則周登善西關則王樹人中城則范深伏羲城則安守和劉士奇大城則李慶雲侯清與毓林

武頌揚字贊卿南鄉人五歲能誦百韻詩工小對辨四音有神童之目幼與諸兒戲一兒升樹摘杏失足夾頸於兩枝間羣兒束手無策旁有磚一堆頌揚運磚於樹下令其足著實而自脫人服其智初入塾攻書過目成誦應童試受知於州牧托剛烈公適回亂作停考久絃誦輟頌揚獨勵志向學家貧常兼農兼賈稍暇袖出書朗讀人訕其迂不顧也兵燹後入泮旋食廩餼前後居父母喪以哀毀稱孝己卯登薦庚辰聯捷進士授福建知縣岑襄勤公器重其才適巡台令隨往沿途讞獄彰化縣積案二百餘不三月而清結民無冤滯鳳山縣教

天水縣志

卷之十一

二

蘭州國民印刷局排印

堂被搶官經三易案猶懸頌揚廉其情懲首事償教堂英領事折服事上譯署王大臣大激賞從優給獎委岐后通商總辦蓋從英領事之請也其宰恆山寧化鳳山各縣廣設義塾漢番同化比戶絃歌海濱儼然鄒魯也閩垣漳泉太水頻歲洊飢力勸南洋僑商輸賑全活無算敍勞加二品頂戴晉封一品封典賞有功也辛亥後解組歸里道經陝西因匪患路梗卒於長安旅次年七十二

張世英字育生天水人父榮以工業起家母蔣歿時英七歲哀毀如成人鄉里有孝子之目每晨入塾必先諸生年十五能背誦五經四子書十七入邑庠清同治元年歲祲奉官諭捕蝗獨力其秋回亂起代父守城數年夙夜匪懈父病醫藥汲水之役必躬親之及歿棺衾諸物必豐必備不以艱窘而稍殺也夙嗜酒居喪時點滴不入口繼母傳持家有法而嚴乃委

曲得其歡心歲饑以販糶得資擬還夙債旋盡賙給戚黨兵火十年民不聊生楚軍翼長周開錫戾止爲痛陳積弊因創辦理民局以輕徭役襄甘南釐務以裕軍餉均能實事求是光緒丙子舉孝廉庚辰成進士入館選癸未改選陝西甘泉知縣自此以來歷任八縣二州所至先革陋規次清積訟修葺文廟慎重祀典彰賢孝勵風俗戴星興息經二十八年如一日惟邠州鳳縣權篆日淺其堪述者如甘泉之清盜墾荒城固堰工之弊上下其手者無孔不搜乃總籌巨款富商儲之正紳主之事濟而民害永除至教痞恃勢陵民者亦因嚴明而折服武功傍渭之田分別崩岸之新舊以蘇民困發摘書差之中飽以溢賦額石泉當興漢孔道差徭極繁苦累不堪乃捐金五百爲倡籌款買田以充諸費且地界蔓訟幾成痼疾一朝剖晰永斷根株蒲城賦甲通省而輒以熟報荒查勘得實溢銀萬五千餘兩而勘費八百餘

天水縣志

卷之十一

三

蘭州國民印刷局排印

金則傾囊自捐鳳翔衆商蠢動權酷者激之也前官黨於局司擬興大獄乃薄懲數人事結而上下悅服他如霉糧之相機變易叛產之籌抵釋累均能處置有方裕國便民商州歉收成災巧官諱未上聞乃請格外施賑全活無算至於渭南地界要衝民風奇悍上述諸弊幾靡不叢集於茲乃始終三任依次施治卒使全署諸人下逮獄囚讀書之聲日夜不絕入城農民非記誦本日應識之字恐被研詰未敢冒然而來以最繁難之區而能閒暇如此則政簡風清可知矣其奉令勸事也如長安西南之水災乘輻輳而於巨浸中探田之間否則施賑自免漏濫之弊扶鄜傍渭之田互爭輒釀命案旣明已往清丈之誤癥結立解歷充鄉試同考官者三得人尤盛扶良培士如嗜好然先後立正蒙宗銘各書院創設學校無任無之且酌地方情形多多益善於渭南竟增至二百餘所學使親勘得獎忌者翕服生平積誠相

感信孚朝野秦民之愛戴也去思有碑相望於道大吏之倚重也於興學則許爲有本有文
宜古宜今於賑濟則曰憑君爲此不在報銷又曰言出該令惠定及民至於畝捐闕息則蒙
素得民心一言解散之敷奏其見許如此大計卓異除州陟府傳旨嘉獎者五次政績爲三
秦之最循良稱全陝第一清宣統三年甘督長庚奏調襄理自治卽上輕弊恤民事宜欲以
治關中者移治隴上而客官皆不悅陰排擠之乃命先由秦州試辦於是周歷四鄉苦口勸
導變周禮比閭族黨爲區社村甲各立之長規模粗具矣辛亥川陝事起總埋城防羣情賴
之以安次年春戍卒忽倡獨立省遣防軍亦同日至幾交關矣乃念切殃池挺身排解而摧
挫備至儼成集矢之的雖屢瀕於死弗顧也終奏和平解決之效於時創設經徵局剔除書
差積弊人尤稱便省局机隍派人歡迎晉省遂裨以整理財賦之責實因協餉停止諸軍林

天水縣志

卷之十一

四

蘭州國民印刷局排印

立欠餉無著計軍政各費入不敷出二百餘萬爲救眉急計乃開辦房契皮毛牲畜諸稅以
彌補之若夫融族界聯情誼散軍隊却外債其居中斡旋隱爲甘人造福者非淺未幾旋歸
適值白匪陷城大軍雲集爲籌供支所需先取諸己以爲倡其繼也風鶴頻驚乃宿食於城
樓者數晝夜擘畫綢繆亦云瘁矣自昔成立家廟歲時聚族袷祭敬先篤親無時或懈曾捐
金萬餘創立亦渭學校於縣城至此又於山莊特設蒙學親爲講解夙好古代禮樂在官行
鄉飲鄉射禮者七在家行冠禮者再自來以幹事爲本故立論不喜高潔臨機堅忍持重謀
定後動雖大力者不能撓也平日教妻妾諸孫以朱子小學鷄鳴而起秉燭讀書雖老病猶
未肯輟爲人作字未嘗雜一筆行草對客無倦容爲諸生時爲業師范京川持服茹素三閱
月母氏傅生則板輿迎養歿則千里奉安居喪以食粗糲致病幾危後因其妻杜氏之喪勉

斷蔬果以脾困致不起卒年七十有三

楊懋桂天水人同治回亂其父清庠生恆避居甘泉寺之別墅忽匪大至恆被虜匪詢知其家饒示意須重金許贖戚族以匪譎詐恐墮奸計並害之無敢往者恆五子懋桂在城聞信星夜馳赴躬罹其穴以金贖恆負而歸

王孝子秉智伯陽渠人每自外歸必先問父母飲食身持長齋父母之甘旨力供不怠晨昏定省愉色婉容人以爲難性好善恆樂在各鎮講書勸善其錫類之仁如此晚年作新興里某寺住持葉荃軍過村有某氏子兼桃三宗被拉差母泣欲死孝子聞之慨然往軍中替歸初猶待之寬及東下以讎伯陽渠故日被打且餓至圓嘴鎮之白楊林徧體傷痕委頓不起始棄諸路旁家人得信舁歸數日而歿

天水縣志

卷之十一

五

蘭州國民印刷局排印

劉思明伯陽渠農民也性豪爽民國七年九月入城探親值葉荃軍撲城闔城登陴拒守胡鎮台立成率軍出禦乏人掌旂思明毅然自任胡嘉其壯許爲前驅出奪城北之皇城山頭槍炮轟烈士氣激厲自辰迄午葉軍敗退思明奮勇窮追被砲亡胡鎮覓骸棺殮助資送柩歸葬並擬題旌給賞銀洋一百二十元以恤其家成命已出旋因胡鎮病歿事遂寢

周務學字本齋天水人性豪爽爲諸生時卽慕江忠源之爲人鄉選後知交楊增新權河州篆敦請襄理賑災實事求是全活頗多清庚子之亂兩宮西巡長安兵民輒齟齬務學身任都察市廛賴以粗安因疾旋里督修東關城垣隱以兵法部勒夫役箬笠草履身先操作以故事半功倍嗣增新保薦贊襄陸軍學堂事宜權司監督勸勵學子不遺餘力時與諸生競較技藝精益求精一時學風丕變暇輒研究兵書無停晷甘督升允稔其賢薦之朝授安徽

知縣旋奏調回甘充常備第三標第三營步隊管帶毛慶蕃護督篆深契重特升第三標統帶加協參領銜務學訓練有方爲一時諸軍之冠嘗愛岳武穆文不愛錢武不怕死之言謂苟能勉盡一分庶不愧此生遂號其軍曰忠武清宣統三年民軍四起朔方匪徒乘機假名獨立恣意標掠制軍長庚授務學爲靖北使者促尅期掃邊爲人所搆不克行時有愆愆其響應東南者答以禍桑梓而倖功名務學雖愚斷不出此民國成立以保全大局功加陸軍少將銜忽外蒙獨立邊氛日急甘督張廣建令以忠武軍統領權攝邊關道尹篆坐鎮西陲籌設官錢局誅匪首韓應中梗頑潛踪閭閻安堵獎三等文虎章肅州祈連山麓之水居民引以灌田然水性猛又崩潰常爲田害務學捐廉爲倡籌集鉅資鑿石砌壩貫以鐵椎害旣除而灌田愈多民利賴之玉樹土番二十五族向隸甘肅青海蜀人因地界起爭執中央知

天水縣志

卷之十一

六

蘭州國民印刷局排印

務學樸實耐勞特派爲勘界大員衝寒冒險徧歷荒塞經年宣德達情番衆悅服卒能言歸於好其地有通天河皮筏引渡屢遭不測於結古創建忠武橋往來稱便使還不復其兵柄適隴東各縣因驗契戕官土匪紛起乃以務學爲涇原道尹總辦清鄉下車之後懲惡安良吏治一肅獎四等嘉禾章重建文廟節孝祠創設師範女子各學校政化方始又改西甯道尹務學知當道忌之深時楊增新已督新疆屢電約乃毅然出關增新假以兵權薦授阿山道尹加副都統銜兼任外交特派員墾務監督倚爲北門鎖鑰地鄰俄疆適俄新舊黨交鬩舊黨奔入阿境新黨躡追其勢甚驟交涉不效而衆寡懸殊戰守無所可務學生平以義烈自命不肯以棄職圖苟活志決身殉客有以走計進者斥之旋叱退左右題壁曰毋毀我室毋傷我民盡守土責殺身成仁擲筆以手槍自戕家人聞聲集視則右鬢洞穿已畢命矣年

五十有三時十年五月九日也

楊潤身字雨亭一字德馨號槐山賦性誠懇取予不苟清光緒戊戌成進士籤分刑部主事入秋審擬稿必詳求精思不敢輕下一字恐誤人命也德宗西巡以扈駕功應奏獎竟弗及澹如也辛亥之變潤身繞道西歸杜門不出俄以鄉望被選爲衆議院議員及至京合選議長票皆以賄致獨峻拒之復辟事起歸闕園於羅漢山下自號羅漢山人日以讀書時花自娛每讀孟子上無禮下無學之語以舒憤潤身事繼母孝及其歿也供職京師恨不身親含殮廬墓三年長兄子早孤待之如所生幼育於姑母家及官京師爲姑請旌表置田產水磨以恤其孫曾從學隴南書院最久通經史能文章而尤深於詩與春秋傳左氏鄉人議立高校潤身欣然提倡捐洋二百元捐書三百部並地理圖書標本好啓迪後進北鄉知名士多

天水縣志

卷之十一

七

蘭州國民印刷局排印

出門下所著有槐山詩文集律例講義若干卷千家四時詩選當代名人雜抄各若干卷子二長集瀛次集洲集瀛畢業於國立北洋大學現充甘肅大學教育長

夏瑚甘泉鎮醫生也素負正直名遇事不屈撓民國十五年孔軍退走至鎮搶掠鎮民逃竄一空瑚年六十餘未及避潰軍迫令尋富戶極口詈罵毫不畏怯竟中彈畢命瑚雖死而潰軍亦頓斂其凶燄全鎮賴以安

周希武字子揚號繩之幼時常篝燈讀書或終夜不寢家貧常借書於他人十六遊庠食廩餼歲試輒冠軍葉學使許爲學人且有開繼隴學之褒母劉氏患病委頓希武扶掖侍湯藥不少離停科後入甘肅陸軍學堂未幾東遊長安時鄉先達張世英宰渭南希武往謁張奇之贈以書籍又徧謁關中諸名儒學遂愈有根柢歲庚戌世英解組歸田創辦自治希武極

力贊襄而輕弊恤民諸大端以立尋充天水縣署科長力除積弊民國二年春任甘肅省立第一中學校教務長兼國文歷史教員逾年改任涼州第四中學校校長整頓校務不遺餘力武威李叔堅宿儒也杜門謝客希武上書謁之得詢考訂之學尤潛心歷史地理於邊務講求有素時玉樹隆慶以爭界膠葛事連隴蜀希武上書甘督指陳是非並建開發青海之策遂隨勘界專員周務 涉河湟度崑崙犯瘴癘冰天雪地艱苦備嘗沿途考其山脈水道番情土俗爲玉樹調查記歸後寧海鎮守使馬麒聘佐戎幕由祕書陟爲使署總務處處長飛書草檄咄嗟立具悉協機宜沿湟諸番蠢動麒奉令剿撫希武內贊機密外理繁劇籌措有方事集而民不擾積勞保至薦任職晉給五等嘉禾章兼攝西甯縣篆抑強扶弱政尙寬和尤盡心公益教育資助留學諸生解囊數數無吝色十三年南旋省親乃由隴入陝而豫

天水縣志

卷之十一

八

蘭州國民印刷局排印

而鄂以及皖贛江浙折而北抵燕晉凡所經歷觸物感懷均賦詩以紀壯遊遠方得異味輒寄歸奉父甘督陸洪濤應出席全國財政委員會電邀希武爲代表體量甘省情形多所規畫同鄉鄧寶珊馬福祥先後延聘均善辭之逾年返湟值黨務激進希武遂於黨義被選爲西甯縣黨部監察委員又充二十六師特別黨部籌備員十六年夏循河土匪滋擾河西軍多譁變希武輔馬使力持正義擁護省府適蘭甯道梗謠詠繁興希武與朱繡趙從懿銜命赴省面陳機宜有以險止其行者希武以食人食死人事答之行至距甯七十里之老鴉峽槍聲四起中彈墜馬以齒嚙肩而卒時年四十有三

王承舜字孝伯北鄉沿河城人幼奇疑有大志就學城中高等小學卒業後入第一中學升北京工業專門學校爲學重實用精數理造詣爲同學冠鄉里後進至京預考者率就補習

樂爲講解性强毅豁達大度有俠行旅京同鄉緩急皆賴之趙權胡國光之喪均賴其經紀先後歸葬時同鄉客京者衆而意趣多殊承舜獨超然不偏不頗遇有糾紛能以片言立解或嚴詞折之亦弗怨也十四年畢業以衆望所屬歸長第六師範整頓改革不遺餘力校風爲之不變論者謂自有師範以來無此盛也時北伐軍方出師廣東承舜邀集同志首立天水縣黨部倡導革命爲甘肅各縣有黨部之始時國民軍張某駐隴南部下欲奪附屬小學校址承舜據理力爭雖斂退而陰銜之既而佟某替防有縣長某欲以清丈土地爲攤派畝款之基試探地方意承舜獨不阿遂亦銜之交相構釁多方誣陷迨後對簿省府而純潔爲地方之心乃大白省城識與不識咸重其風骨焉官方欲畀倚之不就各校紛請任教職亦不就應青海故人約往遊至則仍以教職相屬不得已始留未久河湟事起孤城日危承舜

天水縣志

卷之十一

九

蘭州國民印刷局排印

知糜爛不免思回省有所建白行抵享堂老鴉峽遭伺者狙擊死蓋匪誤以爲國民軍之官吏也士林惜之年三十有二事後其族弟繩祖覓其骨歸

汝迪先字惠菴甘肅武備學堂畢業曾充新疆陸軍新編第一標督隊官陞任藍翎守備獎五品銜民國初歸田十七年河匪不靖天水興辦民團公推迪先爲北關團總勞怨不辭教練有方是年十一月十三日匪至南河川迪先率北關團丁扼守北山黎明遇匪邀擊於泰山廟左側又鏖戰於半個城旣而匪來愈多勢不能支團丁四散身不及脫擁見匪首大被贊賞謂率百餘鄉民敢當數萬之敵自甘涼寧平而來未見如此之勇壯也親釋其縛欲延爲賓佐藉資謀畫迪先佯若不聞威脅利誘終不允匪首怒迪先乃大罵不止遂遇害吉師長鴻昌爲立精神不死豐碑以紀其烈

胡文斗字仲槎東鄉人童時負大志民國二年入東泉高等小學好研究經史大義五年赴京留學入清河陸軍預備軍官學校試列前茅選送日本成城學校升士官練習聯隊畢業名第一日皇持賜章服寶刀東督張作霖電中央留之文斗不應適甘督陸洪濤調之回甘中途聞父訃歸家哀毀幾不欲生葬後赴省充督練及參謀主任各職教練新軍擬成鄉里子弟爲隴上勁旅忌者排擠鬱鬱不得志遂託東渡作浪遊過洛陽鄉人鄧寶珊留爲其參謀主任適國軍東征指示發縱迭克彰德大名保定正定諸城師達京津李督景林以數萬勁旅夾運河而軍猛進衝突鄧以孤軍相持兼失地利力不得展幾受包圍文斗揮全師外衣屢爲彈穿卒能陷陣衝鋒轉敗爲功而李景林宵遁遠近皆服其勇隨赴保定補軍訓練忽吳孫背盟樊鍾秀倒戈全局決裂知餘燼不可收復遂毅然赴粵旋有第六軍軍士教導

天水縣志

卷之十一

十

蘭州國民印刷局排印

總隊長之命北伐時充第六軍第十九師參謀長由湘赴贛無敵與抗嘗以三十六人攻克南昌兼任第五十七團團長升第十九師師長下九江攻安慶克武昌旋又轉贛師行輒克雨花台之役以數千人當敵數萬精銳孫傳芳由此敗潰當時政客挑釁漢甯爭政獨文斗始終從國命遠利祿厥後唐生智抗命葉開鑫叛變旋起旋仆者恃十九師屹立其中所以各軍能因勢乘便也繼升副軍長兼任長沙警備司令又升任第六軍軍長紀律修明所至兵悅民安望重南州後在新喻剿匪爲部屬所害年三十

潘世俊字萃千東鄉人幼讀書鈍顧不以鈍故輟讀早失怙恃家貧齒繁從諸父力農旋業商輒致贏家漸饒諸父沒析產凡沃田推諸昆弟及猶子而自擇其薄者析後有不能治生者代管其田築其室或負債則償之食艱則給之無畛域分潘氏族大而散處倡建宗祠捐

資鳩工宗人感奮相助落成又於祠旁立家塾延師教族中子弟籌款權子母爲常年經費置祭田立宗規修家譜悉合禮意其族 屯糧百餘石舊分十里嘗賠累不堪俊呈官歸併於一逋累水除鄉鄰有爭俊排解不使興訟親友貧乏輒資助之東泉高等小學校經費支絀俊勸募二千餘元以資補助社棠鎮有渭渡造舟費由官歲取諸民不勝煩擾俊募捐改歸紳辦以蘇民困張紳世英創辦自治民多疑謗獨俊贊之甚力銀糧官收諸弊叢生立經徵局身自經理釐剔中飽官忌侵權諸多掣肘俊以堅忍持之至今官樂民利俊之力也究其生平治家治公任勞任怨不計利害行之以誠晚年病風痺不出多年年七十八歿後人猶思之不置

李肖白字筱川一字類吾縣城人性至孝沈靜寡言讀書聰穎初入兩等學堂以高材生拔

天水縣志

卷之十一

十一

蘭州國民印刷局排印

入第三中學畢業後入北京中國大學政治經濟專科斬然露頭角旅京鄉人無長幼咸愛重之凡五載學成始歸時京漢路阻取道包綏都統馬福祥夙重君品屬以記室以歸覲辭抵蘭省長林錫光復以襄助省公署教育科堅留再辭弗獲仍以歸覲爲請許之抵里一月曲盡親權到省瘁心所司洊至科長積資以薦任職保用十七年委任湟源縣長辭不獲遂往時外鎮與省方互相疑嫉已机隄不安凡自省至者輒嫉之肖白頗披誠相與仍懼不之信百計阨之而大局日惡阨之者益恣肆無忌逐求之事亦踰越常情初猶委曲耐之至誣及地方正紳始慨然曰此其意可知也吾不死不足以遏逆焰至五月十四日遂潛飲酖而死時年三十有四抵任方數日耳臨危端書遺囑三紙詞氣惋惻觀者泣下而一邑善類卒因之而得保全僚案中環縣安子偉經理身後之事致柩而歸并鳴其事於大府亦義矣

哉

李天煦字訢之別號赤峪山人世居縣南十里多嘉莊祖父俱邑庠生天煦生而穎異五歲即能文年七齡郊外散步偶吟有暑退千家爽涼生萬木秋之句驚其長老訝爲天才歲癸卯入學讀書識其大者性端靜勤樸人見之如臨高山氣爲之肅父捐館居喪哀毀廬墓終制嘗襄贊鄉紳張世英輕弊恤民其練團興學保甲諸條規及歌詞多天煦所擬以公正不私忌者幾焚其居弗顧也民國六年任縣立亦渭小學教員旋兼校長幣制屢變經費頓絀天煦捐銀四百以擎持善誨人每閱文百十卷一字不妥必精思而改之常燭跋嗽發握管不止以此積勞成疾而生徒則日衆又組校董會創辦初中十八年大饑加以疫癘死亡枕籍天煦竭力振救憂勞交困病卒於家年四十六著有赤峪山人集若干卷長子瓌國立藝

天水縣志

卷之十一

十一

蘭州國民印刷局排印

術專門學校畢業現任甘肅省黨部執行委員及蘭州中山大學主任

蘇蓋字獻廷號枚庚統武之次子也兄弟三人孟季皆庠生蚤卒蓋性孝友父疾篤嘗糞驗吉凶光緒丁酉舉於鄉三上春官不第改就教職畢業蘭州速成師範學堂充隴南中學堂教習時辦學者多佐貳官與學子易齟齬蓋講授能得士心故能調停其間部選安定縣教諭集諸生不時講論在任四載士風丕變安定宰知其廉介請助各鄉賑務全活甚多且爲游揚於毛方伯特傳見面許其淵默儒雅擬舉卓異以丁母憂歸在家襄辦高等小學稱得士民國初充農會副會長迭司樞務於中衛清水各縣嘗游寧夏或勸入馬護軍使幕不從在省任禁煙總公所事多年蓋和易簡略好交游不屑問家人生產嘗下第後南遊江漢得江山之助刻意於詩夙好酒飲輒醉客居家居日與二三同志銜杯拈韻雖蹉跎偃蹇晏如

也十八年以疾終於家其爲詩長五七言律著有愛日堂記梔子亭雜鈔

趙鍾琳字獻一清增生性和慧事親先養其志昆季怡怡然朋儕間從未見其急言遽色鄉譽日隆公舉爲大城紳士清光緒中葉河湟之變天水興辦防務修築城垣鍾琳任事惟謹夙夜匪懈未幾贊襄賑務愈矢勤奮巡道丁體常錄勳上聞特授五品職銜以資激勸迨賡續接辦河堤及工藝廠諸務急公之志老而彌篤人皆賢之鍾琳精岐黃術遇奇症能預知其變端所言歲月不爽書畫篆隸無不精絕人珍視之平昔教子有方四子皆才各食其力孫繁衍晚歲尤孳孳於學卒年七十有五

趙蔭棠字士軒鐘琳孫也畢業中學歷任小學教員造就甚多又邃於中山主義任縣黨部委員任事最忠勇十九年馬廷賢攻城蔭棠代表縣黨部充團防委員會稽查巡行城垣者

天水縣志

卷之十一

十三

蘭州國民印刷局排印

凡三日夜不稍休城陷被害通衢不負其職可謂見危授命者矣年三十有二

王耀德字銘卿性敦厚十三歲失怙家極貧奉老母撫幼弟薄田數畝躬耕自給加以兵荒事蓄艱難而誦讀仍晝夜弗懈旣入泮食廩餼設帳於里門兼教兩弟菽水承歡孝友藹然乙酉得選拔授教職歷署平涼蘭州府學教授皋蘭靖遠縣學教諭補平遠縣學訓導充求古蘭山各書院監院及官印書局提調最久所至以誠樸爲士林所信仰陶勤肅公督甘時尤重其品子廷揚廷鑑同年遊庠又同鄉薦猶子廷翰尤有聲于時皆耀德之教也廷揚旋死廷鑑以考職爲吏部主事耀德就養京師而廷鑑驟歿耀德以垂暮之年抱痛西歸天窮之矣而義命自遣不至以憂傷性廷翰迎至省垣重尋遊釣辛亥後耀德知天下將紛紛憤然返里優遊隴畝間又十餘年七十八終於家

王成德字協一耀德弟也幼失怙家貧丁寇亂晝佐兄勤耕作夜則乘間劬學雖嚴寒盛暑不稍懈及補博士弟子員時論期遠大以親老不忍離左右遂絕意進取晨昏定省鄉里稱之嘗創家塾教子弟及遠近附學者二十年中門弟子著錄達數百人凡豆觴雀鼠之爭折以片言無不立解狡桀之徒亦嚴憚之于地方賑務學務殫盡智慮如營其私晚年耀德解組歸食與具出與偕形影相依者幾二十年清光緒末由賑務出力奏獎訓導以姪廷鑑官吏部馳封中憲大夫民國十七年歿於鄉年七十有四子廷翰以優增生畢業甘肅文高等學堂被選爲國會衆議院議員以簡任職歷任重要差缺有聲于時

蘇達北關回民性孝勇父老患惡瘡達每晚赴寺禮拜哀禱願以身代歸則以麻油漱口吮吸逾時如是兩月餘父疾得痊鄉里稱之二十年川軍驅匪抵境時有南鄉扇子會股匪馬

天水縣志

卷之十一

十四

蘭州國民印刷局排印

瑞生史國華等溷跡其中強佔回民室廬方衆均遠避達獨不忍離父左右元月二十日夜史匪縱兵搜掠達方汲水出歸見匪以竹籤釘父十指拷索財物先跪而哀求匪置不理更以木挺狙擊達痛父心切眦裂髮指卽覓廚刀砍匪立斃正擬棄屍他所負父奔逃適匪呼夥至父子俱死焉

緱甲卯牡丹園之緱家溝人膂力過人素有胆氣民國二十年二月十二日扇匪數千呼嘯入村村人皆竄卯獨手執鑿柄與匪戰月下遂死之天明家人尋視見身帶數傷鑿猶在手其柄爛如麻絲手折匪矛十餘支則其與匪往來相持非一二時可知亦奇男子也

張忠字子進西鄉楊家寺人孝事祖父友于兄弟清同治初回變作烽火遍隴上忠時年十五襄辦鄉團以保障閭閻功保同知銜候補州判知州陶模因公至鎮與語大悅委爲西鄉

總紳忠於鄉黨之貧病無告者嘗量力仗助遇有爭訟必多方調解故悍夫神沮善良獲安光緒四年歲大侵陶牧素諗忠公正委辦賑務忠不遑寢食實事求是全活孤獨羸疾以千計繼辦社倉三十餘年尤清白無私巡道丁以義重梓里扁額旌之光緒甲午河湟不靖忠爲預防計辦理清鄉禁暴詰姦四境賴以安堵地方至今思之

哈銳字蛻庵號鈍齋其先閩人奉回教明季以武職宦於秦家焉銳幼穎學使吳大澂許應駸咸器重之時任土言先生其昌講學隴南書院銳最稱高弟舉光緒壬午鄉試壬辰成進士朝考一等散館籤分刑部四川司主事時盛伯熙祭酒主騷壇謂銳弗留館實扼腕事熱河王梅岑侍御渴欲一見盛屢屬謁終不往旋奔母喪歸二十一年河湟亂作清水回被煽關右震銳爲痛陳利害勸勿動分巡道丁體常辦團防責銳總其成銳密請丁保獎張家川

天水縣志

卷之十一

十五

蘭州國民印刷局排印

搢紳李慎堂斬禍首馬某隴南始安河湟賊勢頓沮尋赴部戊戌政變丁父艱歸拳亂作兩宮西狩山左唐承烈總行在事函促銳抵陝主教馬光烈擬爲納粟轉知府安維峻侍御力薦爲董福祥記室皆峻拒之三十二年投牒吏部註選知縣以繼母老告近出知蜀壁山縣事壁山宿稱難治縣官歲數易銳至人不敢私在官五年遠邇頌其清大吏褒其能調署宜賓考最朝旨嘉獎宣統三年大府奏補南充甫奉部覆復命攝樂山篆未幾鐵路公有禍興各縣會匪揭竿起號保路同志會陰肆凶橫焚掠劫獄川南幾無完土樂爲水陸要衝尤遽聚焉銳請於大府戮數人匪咸欲甘心縣紳議續以多金贖匪免殺掠縣官境益危屢思自裁知府李立元時慰阻之匪遂搜掠官民殆徧是時滇人葉荃部荃字營駐雅州事急銳與府李商請葉援葉旋偕某營至攻急城破匪幾殲葉挾索萬金始遣某營去時俘匪衆官民

忿深欲盡誅銳不可爲省釋二百人重慶革命匪復熾而葉亦欲併雅嘉敘三府爲滇有以所部多川人軍譁變葉逃匿城中愈糜爛潰兵時射擊縣署銳曰走府治事搯拄弭亂潰兵漸投歸統馭無人危甚銳急謀紳衆請府權管領免潰決復爲籌犒賞安叵測漸遂感服匪勢絀樂山嘉定府治白蠟硝磺權運之利盛繁不逞垂涎久司事者多被禁錮勒抑力爲謀悉脫去於是嚴偵察誅姦宄展轉經營漸復其舊而銳心力並瘁遂告養民國元年春赴渝寓居時榮縣趙熙亦淹留與銳酬唱流連七年始歸九年爲隴南鎮守使署顧問多所規善創設存古學社與縣人胡中林倡辦炳興火柴公司及馬廷賢據隴南事曰棘遂杜門屏不與見久之憤發鬱鬱卒年七十七著有詩文集及手訂年譜

張濬川字哲生世居邑之伏羲城幼好學穎悟異羣兒九歲失怙母胡氏紡績供讀值母不

天水縣志

卷之十一

十六

蘭州國民印刷局排印

憚百計求歡至悅乃止與兄濟川先後以第一人邑庠時母尚健鄉人咸謂爲德報云母歿濬慟絕逾時始蘇營葬如禮不苟輩者百日清末政變鄉人周務學薦舉當道聘爲甘肅省陸軍小學堂國文教員學生翕然向往辛亥後歸里充任省立第三中學校國語歷史教員者二十餘年儀容厚重聲宏音遠履其門者無不憚畏讀書務躬行黜浮囂學生一經講掖無不立就範圍暇日諸生來私第講學竟日不倦翕然如家人父子見者皆稱贊不置性友愛事兄如父兄議折產濬盡與之絲毫未受兄歿遺子二女一教養如己子性嗜靜弱冠嘗居太昊宮孤身苦讀不通外謁顏其齋曰習靜軒中歲曠達蓋有所激晚年鰥居復歸於靜一卷一燈洒如也年六十嬰微疾遽卒士林皆爲之嘆惜省教育廳卹金二百元隴南教員得卹濬其首也清庠生趙琨字鎔石省立速成師範學校畢業爲人敦品好學充縣立高等

小學校校長十餘年成就甚多十九年河匪陷城憂憤以終士論惜之

郭希璞字蘊珊北鄉蘭渠村人少穎悟以孝友早著聞於里閭祖特彥父愷均庠生希璞承緒奮志於學光緒三十三年鞏秦階道甄拔秦州優級師範生保升甘肅文高等學堂希璞與周希武選取往學稱高才生嗣返里養疴弟衍璞侍疾唯謹病愈赴省試事已竣當局重其品學優異許以文高等課業成績轉農林學堂畢業始任亦渭學校教員民國二年任省立第三中學教員旋兼任省立第六師範教員教授鄉里迄二十年績學冥思善誘導治理科者成就尤多而希璞之博學強記不囿於一隅生徒更樂從之游民國十三年卒年四十九士論惜之其詩文遺稿存於家子四長世汾亦習理科畢業北京郵電專門學校誠謙有其父風

天水縣志

卷之十一

十七

蘭州國民印刷局排印

任承允字文卿鄉先賢其昌之長子也三歲失恃育於祖母黃及繼慈堅性沉靜虔承庭訓淡營寡慾惟喜讀書目光炯炯不苟言笑年十八人邑庠旋食廩餼二十五舉於鄉三十一成進士授內閣中書以能文名於都下客久思親假歸過陝適鄉人張世英權篆鳳翔位虛舉比卽挽留之兩易寒暑再赴都充國史館協修方略會典兩館校對無何變起倉猝聯軍進逼兩宮西狩其昌以憂憤卒允則轉徒鋒鏑間音問梗塞逾歲聞訃間道遄返營葬如禮小祥後先後主講寧羌振文秦州隴南各書院嗣復人覲調補祿米倉監督旋署侍讀又丁繼母憂歸葬甫畢東行中道國體變更乃攜眷返里閉戶著書不復出而問世地方後進多從問學於請業諸子時勗以敦品勵節不專重文辭也先是光緒己丑歲其昌曾修秦州新志至此邦人士以續修州志之責屬之再辭不獲乃完成之早歲精岐黃術迨晚年而益深

邃偶爾談及妙中要竅尤喜閱報紙於全球大勢靡不洞悉每燭一事必深澈底蘊見解迥殊故持論往往出人意表其淵靜之養可想也家世清介當道輒有厚贈概婉却之而於區區之潤筆或斟酌受之亦不矯激也門庭蕭然似未免崖岸者然時與朋儕間詩酒遨遊則又藹然可親手足之誼至老彌篤惟艱於子嗣以其弟承恭之子昭曾入繼禋祀卒年七十有一著有桐自生齋詩文集鄉人鄧寶珊等爲付梓

周肇岐原名尙志字子高早失恃父桂一善畫竹蘭岐工山水書法尤妙由甘肅陸軍小學畢業考升湖北中學辛亥武昌起義與有力焉故爲黎黃諸公所器重改元後承中央命來甘贊襄自治議長李鏡清慷慨激昂岐與同調李爲仇家所害岐亦幾罹於難再赴都門被舉爲國民黨部總幹事嗣因大選在即意見難融乃隨陸將軍建章西入關中歷充憲兵司

天水縣志

卷之十一

十八

蘭州國民印刷局排印

令軍械局局長迨陳樹藩督陝邀爲騎兵統領堅辭不就送陸回京谷部長鍾秀特派調查甘肅實業甘督張廣建目爲幹才岐虛與委蛇陰聯同志圖改革未幾狄道事變失敗乃易服微行由陝入川久之川督熊克武委爲副官長後充第二混成旅團長駐防巫溪兼任縣長又充夔關監督後應胡督辦景翼之召曾充騎二旅旅長迨鄧寶珊克復保定進攻馬廠後防多依賴焉兼任北路運輸總司令陸軍十一混成旅旅長後同吳孚威將軍佩孚轉戰豫南充第八路司令兼警備司令旋改爲第八軍軍長赴川剿匪行至中途被害時年四十四歲

楊楊村原名效震字紹青後更今名西鄉楊集寨人家世業農少穎異力學至性過人第三中學畢業後從任文卿先生遊學益大進母喪盡哀盡禮鄉里稱其孝行君初服務蘭州郵

務管理局繼調任徽縣清水等局局長勤於厥職以時讀書不輟月所人則興辦學校補助教育更爲地方人士所欽許時君雖處荒僻然以知聞日裕蒿目憂當世之艱空山孤城每用慷慨民國元年國民黨設分部於天水楊村首隸黨籍時年尙未冠也因更求書籍報章博覽以勵新識得孫中山先生所著書則精研覃思拳拳服膺歷告所與遊者一時風起雲湧咸歸向國民革命矣十一年六月由陝西靖國軍兵敗岐山鳳翔總司令于右仁從參佐三數人微服失騎走隴上問道流離出危途荆棘尋常不敢道姓名楊村與遇于清水郵局深致誠悃于亦欣然訂交慇懃款曲步步追依送之出境訂後會之約由是益矢志爲黨戮力未久卽辭郵局職入陝佐革命軍幕十七年應于電召供職國民政府審計院迄監察院審計部先後七年彌勤彌慎斯時中央命從政諸青年同志應勤研黨義及致力黨之基本

天水縣志

卷之十一

十九

蘭州國民印刷局排印

工作君更熱忱奮發以爲建國之任在黨細微力作鍥而不舍與鞠躬盡瘁於國之大事者等重昕夕益勤所職京市區分部及區黨部均推爲常務委員歷數載如一日也所應有之資給悉舉以購圖書公諸同志創辦玉泉學校於天水不忘故鄉之教育也國難後奮呼禦侮血淚迸突於是患心疾且劇矣二十三年丁父憂歸麻衣毀瘠幾於不支回京後值考試院舉行審計人員考試力疾監場積勞愈甚臥病不起尋逝於南京年三十有八于公聞之扼腕贈地座於湯山會葬者千餘人國府林主席以下均致哀悼之詞

蕭汝玉字潤生幼有志操弱冠入邑庠旋食廩餼應鄉試不售乃絕意仕進授徒里門學堂創興任私立亦渭小學教席多所造就校董張世英雅重之時張倡辦地方自治汝玉贊襄輕弊恤民諸端頗爲宮庭所不喜先是光緒末州牧私增糧價汝玉偕二三同志籲於省竟

不得直及黃鉞反正因素餉不遂深啣於某統領率衆再入其室屯聚踐掠毀其家汝玉天性孝友平居色養承歡父歿時司榷陰平閭耗馳歸罄資營葬廬墓哀哭逾於恆情弟汝埜蚤世撫孤慰寡殫竭心力教子弟嚴御禮法不少假借故子姪均得學成名立長子祖蔭歷官清水鳳縣姪祖蕃今爲教育廳科長其在陰平也釐除積弊潔己奉公稅額倍越其常民國五年選充省議會議員十一年爲國會衆議院議員解職留滯都門者五六年歸里後方面多故屢出任排解險難弗辭尤以董振務爲久晚年患風痺於二十四年七月卒年六十有四著有愛吾廬詩文集待梓

溫廷傑字仲興北鄉新陽川人世業農幼穎異嗜讀自小學迄第一中學畢業均以資敏學勤稱高才生後入北京農業大學值五四運動勃興被同學推爲代表折衝抗言崢嶸一時

天水縣志

卷之十一

二十

蘭州國民印刷局排印

回省任農業學校教務主任銳意於全省新農業之規劃蓋素志也第憂憤時艱輒慨然有當世之志十三年冬鄧寶珊秉總理革命大義建幟中原因投筆奮起千里從之從自靡役不與間曾爲河北省政府及監察院曹屬皆不久辭去二十年隴南倒懸未解復參陝西警備師幕多所贊維旋爲成縣縣長安輯流亡聲績著聞二十四年春爲夏河特稅局長僅四閱月而課倍裕一時廉名稱最丁母憂哀毀癯立恆邑邑不自勝至是以母塋遷厝得請回籍適匪至其鄉乃召告鄉人曰是匪慘酷所過殘戮無遺今無攻守之具盍相率避之計事未竟而匪驟至遂走堡據守匪悉趨堡抗守半日終以衆寡懸殊堡陷被執不撓遂遇害年四十有二同時被掠有逃歸者語人曰使不罵賊甯至此哉嗚呼烈矣

馬際盛字時泉西鄉窩佗莊回民也儀貌偉岸頗嫻武術道光初隨伊犁將軍某出關隸部

下充皮匠役設皮革工廠塞外苦寒凡官兵衣裘冠裳均承製焉羊肥皮厚曬廠中屢爲虎耗一夜早起月色暗淡見一黑虎掣蝕皮張盛持杖憤逐虎跳撲至迎頭痛擊立斃平明報軍署邀嘉獎授以武職歷升本標左營遊擊任防守事宜伊犁近俄疆凡禦侮交涉搜查匪徒各事均責之在任三年嘗有虎崇之夢後陟參戎尋以病終

趙國棟字宇亭西關回民也富有田產納粟人太學少爲賈嘗往來於贛滬間屢獲鉅資適馬光烈先生來秦傳佈教旨棟以千金奉之求代祈冥福先生曰此汝之血汗也不貽子孫乃贈諸我耶遂毗之馬平福俾權子母以所獲之息按年調恤貧乏有死不能葬或遠行旅客乏川資者視所入多寡留三施七所活無算十餘年末稍閒斷猶積二千餘金純係馬平福經營之所得也民國五年交由吳壽山經營除大爲施捨外尙存五千餘金後忽爲大力

天水縣志

卷之十一

二十一

蘭州國民印刷局排印

者所奪迄湮沒焉

王永昇縣北鄉石佛鎮人熱心公益尤敦孝友清光緒間隴水冲刷岸地直逼街外永昇邀紳士常登高田向榮等開墾河淤故道田幾近千畝二十一年河回亂監工築堡塞備極苦心事仲父季父如所生遇貧人婚葬輒量力欣助堂弟永傑讀書子標習武後均入泮馬炳字虎臣北關菴溝回民業皮工警敏機智儀容巍然見者不知爲藝人也清同治間鹽官匪起以高二爲尊高二者白環里之皮匠向在城爲工心豔秦城人物享用之豐隆屢欲乘隙劫城畏民壯之健銳不果同治四年四月間高偵得秦城無兵率匪到城首卽裹脅菴溝後寨暨窩佗莊回民以壯聲勢然秦回率文弱不堪役使慧點者預攜眷避匿而迂訥者被擄去計男婦老幼三百餘其中明儒理者或青年少婦不少罵賊殉節者炳亦挾眷得脫

仍在城藉藝自贍六年左公西來以內閣學士道員周開錫爲南路翼長率馬步全軍山鳳翔隴州進駐秦城剿撫兼施匪蹤潛消高逆遠遁而秦回盡流落靜甯隆德北硝河城一帶生計枯窘飢凍不堪欲回秦畏沿途民團殘殺正猶豫間適炳爲周公製衣裳舊新更易斬然一新公曰天下事無論大小如果能運用得宜勿爲事拘只求民安患去事集費省上可以對朝廷下可以安閭閻其餘勿置問矣予此次辦理回亂設有人能如爾製衣法勿拘成見俾民事葺予決不惜名器以旌獎之炳瞿然曰吾秦回民盡屬良善前被裹脅勢非得已賊去後畏民團之殘害不敢回家其被蹂躪者苦不堪言今賊已西竄所留皆難民且其中不乏明理讀書之人今流落北地無衣乏食曾乞丐之不若彼中多炳之戚友誠能得公委令親詣該處諭以恩信曉以大義令其自拔來歸不惟宣我朝之隆恩抑亦示公之盛德也

天水縣志

卷之十一

一二十二

蘭州國民印刷局排印

周喜而委之使招諭難民回秦計撫回難民男婦老幼二百餘名口安插於後寨安溝原里旋均復業炳蒙旌獎以五品花翎軍功云

人物二
烈女

范氏秦州人利橋營千總吉明之妻也年二十夫從征新疆葉爾羌沒於軍次聞耗後獨自悲哀不令二親聞而孝養尤謹焉撫孤庭蘭庭蘭未成立而蚤沒復撫夫姪庭芝爲嗣孫二長敏州庠生次勉幼讀守節五十年卒旌表入祀節孝祠事載甘肅通志

按此傳應列入州志續編因已印出附載於此

劉氏聶天佩妻甲寅白匪陷城姑年老不能動命氏隨衆避匿氏不忍離側曰生死與母共之及賊至僅姑婦與兩小兒在賊索財物橫施捶楚氏以護姑受重傷百計哀求不得免乃

給賊謂曰庭後有藏金導之往賊衆隨去姑始挈兩兒得脫既無所得賊益怒謀懸氏於梁間肆毒手氏乘間奔入井賊猶以瓦礫灰塵簸擲不已賊去後家中人歸聞聲救出雖未死然已奄奄一息矣固有孕至是產一女以傷鉅兼久漬水中遂不起

溫蒲氏年二十五歲縣民溫和之妾白匪之亂和帶領民團守城賊破城焚西門吊橋氏見火起知城已失諒夫必死歎曰丈夫年近四十未有子嗣妾何以生爲卽吞藥十一日午後賊退和歸始瞑目逝

蒲氏清監生張思貞之妻年二十一其夫病歿遺一子二女氏矢志撫孤之死靡他張固世族至是家中落生計日窘氏艱苦備嘗卒撫孤成立女遣嫁以積勞成喘疾沒年五十五歲至今孫曾繁衍人以爲苦節之報云

天水縣志

卷之十一

一十二

蘭州國民印刷局排印

張氏清貢生張綬青之女太學生汪晉之妻也幼嫻閨範年十六歸汪氏汪故望族時值軍興徭役煩重家道中落憂從中來病遂不起時氏年二十有七子甫九齡女在襁褓翁衰祚微措持維艱氏時懷刃蓄藥欲以一死卸責翁責以大義乃矢志靡他事親撫兒婦代子職翁喪明數十年飲食步履惟氏是賴戚鄉咸稱其孝翁壽八十而終喪葬如禮胥氏爲之教子成立能復先業光緒末年旌其門民國三年卒年七十有一

楊吳氏夫溶清太學生歿時氏年二十七姑老子幼治家井井有餘民國三年白匪陷城氏奉姑避鄉村驚悸成疾病篤猶諄諄以善事祖母囑其子媳卒年四十有四

樊氏孝廉安存健妻也存健本寒儒氏能勤苦以助其向學登鄉薦存健疾氏日夜侍湯藥不休者六閱月及歿氏誓以身殉其父以撫孤大義責之乃多方羅貸置塋域治喪以葬而

氏室如懸罄矣內而二子一女尙幼外負重債日以鍼黹爲活甚或日僅一餐未嘗乞憐於人二子漸長使就塾歸必課所業使背誦冬夜篝燈督兒讀若嚴師恆鷄三唱始寢氏幼知書嘗舉畫荻丸熊諸事示二子曰吾不敢儕古賢母惟願汝等向上毋墜祖父書香慰我痛苦否則非吾子每每淚隨聲下二子入庠始忻然曰今聊可對先夫於泉壤然訓誨二子益力長子應嵩清宣統己酉科拔貢朝考授職直隸州州判次子應岱由廩生以法學知名氏貧而好施遇里中勞獨量力仗助卒年六十有八民國六年鄉人合請褒揚中央頒匾額褒章褒狀奉令入祀天水縣節孝祠

唐氏丁發祥妻也二十六歲而夫亡遺孤祐甫二齡丁氏本州素封家至發祥雖落而豐厚積習尙在遂至日見支絀氏于歸後肩家政制節謹度漸有餘儲孀居四十年質產皆還克

天水縣志

卷之十一

一二十四

蘭州國民印刷局排印

復祖業然以菲薄持身而於奉姑一毫不肯稍儉甘旨承顏人稱其孝教子有方入州庠劉氏董養源之繼妻兆鵬之孫女也幼慧敏眉宇間有英爽氣曾肄業貞靜女校年十三從父綜宦遊隴東時方失母理家政井井然有條十七于歸事翁姑甚謹前房遺幼子三教養如己出養源病篤問妻曰我死若何爲妻曰同穴義也何問爲及歿氏急欲身殉奈翁防之嚴不得間次年春分謁墳歸吞毒自盡及家人知覺急救之已無及矣年十九

邢氏王潤妻潤充民團保長死白匪之難氏年二十二孤二齡翁姑尙在潤有弟三人氏以長婦奉親教子家人無閒言及翁姑相繼謝世氏柄家政惟勤惟儉爲夫幼弟與孤子皆授室已抱孫矣因匪患頻驚心悸而卒年四十一

梁氏清監生董尊賢妻侍翁姑勤慎盡禮尊賢歿氏年二十四男七歲女二歲親黨勸其改

醮氏執不可時翁姑在堂家教嚴時受呵責氏曲意承奉略無愠色昏定晨省不稍懈事兄嫂亦恂恂維謹及翁姑先後終氏以婦代子淚盡繼之以血親友無不感歎兄嫂亦相繼歿遺孤四俱幼氏教養如己子以生計艱難令子商而姪學不廢各爲娶室以至成立民國十八年大荒氏日減家人飯食以贍戚里之餒者嘗數十人

張氏魏成福妻民國十九年回匪陷城覷氏有恣色欲犯之氏逃藏前巷鬻餅者張姓家匪追至執張烤問張不忍指明匪怒竟將張之一弟一子斫院中張號救其弟妻往救亦被殺仍欲殺張張不得已示藏所氏以終難逃免躍入井匪多方出之罵曰爾愛死吾有利刃遂於井邊亂刀斫死擲尸於井始去嗚乎慘矣

范張氏邑清恩貢生范必陞季子輔之繼配也范故邑大家弟兄皆習儒術不善理生計以

天水縣志

卷之十一

一二十五

蘭州國民印刷局排印

故家寢衰氏出北鄉農家幼精紡績于歸後晝夜工苦家用賴以不匱氏性淑賢前房遺一女尙幼氏撫之如己出氏生二子長鳴宋次炳宋方三齡夫病歿時氏年未三十不獨患貧且塋滿無葬夫地停柩中堂母子環泣戚友皆爲之心酸氏忍痛茹苦誓死靡他先覓地葬夫次送長子學工藝書爲人僱傭昏夜紡績教養子女如此者十餘年長子藝成設肆所入較豐次子畢業中學身列士林男婚女嫁家道日隆孫子繞膝享年六十有八而卒氏因身受困苦凡遇災荒無不竭力周濟至今佃戶尙稱道其德云

鄭靳氏邑商人鄭維周繼配笄年于歸三十許夫病歿遺五子均幼家貧無以度日氏紡績縫紉以撫養之五子之中獨幼子朝勳最孝業縫工所入不豐竭力奉養享年八十有四無疾而終氏苦節六十四年晚年愉快見曾孫焉五世同堂閭邑稱慶

韓氏北鄉新化峪人清鄉飲介賓劉萼之次媳議敘同知允執之繼室也年十五歸劉姑毛孺人好善樂施與光緒庚子辛丑間陝飢民渡隴者麇集氏體姑意煮粥賑濟全活甚多姑病侍藥問膳無間昕宵姑歿服未闋允執與兄相繼沒遺孤四長斌次貞鈺倬皆幼氏時年二十六日偕伯姒金搥胸擗踊以死相期戚族曉以宗祧之義乃垂涕而言曰未亡人豈戀此殘息者但伯氏歿而無嗣姒又孀居二三嬰呱呱何恃雖死無以見亡夫於地下耳卽以貞倬嗣夫兄毅然以育孤理家爲己任後諸子藉母教以成立斌援例貢太學餘習儒業於民國七年卒鄉人士上其事於部特頒志潔行芳四字以旌之

王氏陳萬福妻年二十六夫亡無子撫姪爲嗣家貧依紡織度生活年六十八卒

劉氏張清廉妻年二十七清廉亡遺子一中年亦沒孫二氏艱苦撫之成立

天水縣志

卷之十一

一二十六

蘭州國民印刷局排印

蒲徐氏善軒妻也夫亡子尙幼氏年十九而姑逝迨後翁棄養家計困難繼姑又久病氏奉侍湯藥兼苦紡績卒成家計年九十五卒

雷氏李德安之母年十八甫生德安而夫亡氏卽矢志守節

雷氏郭騰江母也年二十餘夫死子幼家雖貧而操彌厲騰江年二十餘亦亡媳再嫁氏又撫孫成立

夏氏雷五常妻清同治回匪之亂夫被虜未歸氏年二十餘矢志撫孤成立年七十八而卒
郭氏黃玉鳴之母年二十九而夫亡氏懸梁經救不得死奉姑撫孤艱苦備至後子又沒育孫成立

楊氏夏得時之母年三十六而寡遺孤三長者方五齡家極貧翁姑老氏力田養親撫孤

陶氏夏長德妻年二十七夫亡遺一子五歲氏矢志守節艱苦鞠育卒至成立

郭氏雷保民妻保民歿無子氏年二十六撫猶子以守節爲嗣夫黨某羨其產逼令再醮氏大怒娶族面斥擬告發某懼服罪誓不再犯氏得完貞卒年七十餘

陳氏胡聚財之母年三十而夫亡子一矢志不嫁艱苦撫養

周康氏年二十八陳高氏年二十七劉周氏年二十八金傅氏年二十五陳白氏年二十二皆夫亡子幼業農紡織訓子興家而白氏事翁姑以敬聞

劉韓氏清州同劉中一之繼室附生韓鼎之孫女也劉氏家饒於財嫁時鼎訓以孝姑敬夫汝夫家饒若重賑恤以保富氏力行祖訓舉家悅安光緒庚子辛丑間陝民大飢流亡麴聚氏相夫給食全活者衆親族貧乏者施糧以濟之中一疾謂氏曰兄子俱殤余子四以季繼

天水縣志

卷之十一

一二十七

蘭州國民印刷局排印

之余目瞑矣及歿氏一遵遺言與孀嫂金氏居終身怡怡無間言氏年三十六而亡鄉人上其事得旌表

劉金氏年十八夫亡子一幼讀以紡織助束修家徒四壁輟讀務農家道漸裕

劉劉氏年二十五夫亡姑翁旋卒喪葬以禮子一幼讀長耕親族稱其孝

王陳氏事翁姑以孝聞年十八夫亡子一教之耕讀家賴以興

王魏氏童生王爲治妻治嗜讀積癆以亡氏年二十二家極貧親耕教子成立

田氏楊效榮妻年十九效榮沒於渭水聞耗氣絕者再及尋屍歸姑年老泣不食氏抱子調笑百端排解背姑仍痛不欲生人有慰以兒貌岐嶷當獲後福者氏大悲曰余之不死豈計及此徒以老人弄孫藉減憂痛代泉下人伸孝養他非所求也氏事叔姑如姑育猶子如子

妯娌怡善主家周貧恤匱尤出天性鄉黨賢之卒年七十二

岳氏周承祖妻年二十二承祖卒孤明倫三歲氏矢志守節撫孤岳故北鄉望族氏嫻閨範舉動以禮而操作勤苦家道亦裕晚節較甘云

姚氏雷存有之母年二十七某氏雷敬謙之母年三十皆夫死守節艱苦撫孤姚卒年七十
八某氏八十餘

雷雲霆之女哈哈父老無子爲擇婿誓不嫁奉養過於男子爲父嗣一孫撫之娶妻生子女矣操家甚嚴雲霆逝時女年四十二

陶氏馬德義妻年二十一德義死無子撫猶子爲嗣矢志不嫁年六十餘卒

劉氏周六娃之妻年二十二夫病歿遺孤三長僅四齡次幼均在襁褓家赤貧耕織撫兒長

天水縣志

卷之十一

二十八

蘭州國民印刷局排印

次旋繼天氏痛甚幾致不起茹百苦育幼子成立民國紀元壽九十有一守節凡六十餘年侯氏北鄉豐裕里張民功妻也同治間因避亂城居民功業皮貨常客成都家赤貧翁姑饗殮不給以爲人縫紉浣濯紡織傭工所入具甘旨養二親已雖日啖粗糲無怨也翁歿民功相繼歿孀姑以哭泣喪明氏奉之愈謹有二子一女幼者遺腹所生氏苦節四十五年艱辛備嘗教養婚嫁以迄成立

王氏文鎖哥妻年二十八鎖哥故孤幼氏以親老家貧力任耕耘不移厥志年六十四卒

雷氏中灘上王有時妻生子女各一年二十三有時歿家貧守節順事翁姑子後頹惰家益耗氏日夜苦績志氣彌厲民國十八年大飢莊人多逃氏不出庭戶竟餓死劉氏西山坪文瓜歹妻年三十瓜歹歿其苦節順翁姑與雷氏同亦是年一門十八口同餓死氏年已七

十餘矣

裴氏陳全德之母夫亡氏年十九守節撫孤成立年八十三卒

趙氏張養源妻也性溫婉年十九而寡無子撫姪爲嗣素病狂喜靜偕姑寓堡內距家里許

氏操家政垂二十年井井有條民國三年翁病昇歸氏晝夜侍疾憂勞骨立經月餘翁下世而氏亦以哀毀亡

王氏北鄉張進玉妻尙慨孫女也年二十一進玉死子三遺腹子一氏自以母家世代書香誓死以守於夫之遺產遺器常珍視之終夜紡績不解衣臥後四子相繼歿長子遺孤九歲氏又鞠育之苦節五十七年壽七十八

農民朱國璋隴東山人系明太祖裔妻李氏年二十九歲國璋卒親老子幼氏躬耕紡織侍

天水縣志

卷之十一

二十九

蘭州國民印刷局排印

親撫孤舅姑卒喪葬盡禮人皆稱之三子皆入武庠卒年七十有七

張氏朱耨子之母年二十八夫故家無恆業氏初傭工後佃田耕種育耨子成立耨子能孝養人以爲守節之報云

劉氏段友傑妻孝翁姑事嫂如母生一子不彌月而友傑故矢志守節茹素誦經奉養雙親親歿厚葬今子孫蕃衍

張氏董廷士妻年二十四朱氏生員韓書雲妻年二十一皆夫死食貧撫孤辛苦備嘗孀居五六十年張壽九十四朱七十七兩家子孫蕃昌氏之力也

王氏沈自有之母生自有四歲而夫亡家貧不能自給母欲令再醮以養孤氏哀慚峻拒有地一塲耕種謀食並佐以紡績性方嚴鄰里婦嫗對之不敢出游語終身持齋誦經自有成

立家道裕矣

張氏何猪瓜之母年二十六夫亡子尚幼又遺腹生一子家極貧叔利其嫁迫令再醮至於破扉毀物威逼之而氏不從忿欲控官叔意始沮卒守志撫子皆成立壽七十六

張氏監生張鍾秀妻年二十七鍾秀故遺五子皆幼族人覬其產迫令再適氏堅守不爲動比子成立勤於耕作家道寢昌子孫蕃衍

縣氏常保保之母年十八夫逝未有出而家又極貧氏以保保嗣誓志守節紡績以養親撫孤保保長能興家翁姑相繼逝葬祭皆盡禮氏卒年六十五

劉氏張樞泰之母夫故時樞泰生僅百日家中落艱於撫養持身勤儉茹苦四十餘年恢復舊業

天水縣志

卷之十一

三十

蘭州國民印刷局排印

烈婦王介個農人張清貴之妻于歸十日清貴遽卒婦常哭無已其母來唁慰哭益慟母不敢多言尋仰藥而死

董烈姬武頌揚之妾也烈姬浙江產襁褓失怙恃兄嫂不善視之六歲時福建興代張協戎春和收爲義女賢而且慧頌揚與協戎爲莫逆交爲求嗣計遂聘爲筵室時年十四勤謹知禮飲食操作必精必潔頌揚治家嚴肅未嘗有過也常持齋誦經爲頌揚祈福壽歷二十年如一日頌揚病歿姬乘夜飲毒以救得蘇久之朝夕哭奠料理家務如平時防範稍疏乘間自縊以殉後頌揚歿九日

郭氏南鄉黃文學妻事親孝于歸後舅姑尤鍾愛十九年回匪擄掠其村氏驚竄匪追之急投崖死正月嫁五月十日殉難年十六

李氏南鄉天水里學生楊豐妻年十九夫病服侍不解衣數十日及歿家人方理喪氏於翌日乘隙懸梁以殉遂合葬焉

鄧氏緱甲卯之妻慟夫慘死悲痛氣絕以殉

鄭氏蒲匄子妻年二十匄子歿氏送葬歸吞毒亡

毛巨堂妻李氏年十九巨堂商於石佛鎮民國二十一年一月七日回匪北潰巨堂被害矢志守節翁以其年少無子欲嫁之氏探知往哭夫墓歸即吞毒自盡

鄭氏孫世寬妻平日敬事其夫世寬遭震劫死無子氏不食五日而死

侯馮氏南鄉人年十九夫死遺 方週歲夫兄弟五人伯仲相繼逝仲之妻楊改醮遺子三歲氏撫養孤兒兼育猶子及兩夫弟煢煢一身艱苦備嘗父母憐其早寡多方勸嫁氏堅不

天水縣志

卷之十一

三十一

蘭州國民印刷局排印

允有田十餘塲晝則刈草犁地夜則編毛織麻以爲常及兩夫弟漸長爲娶妻始託以家務王崔氏年二十八夫逝二子幼家貧氏不欲生哭泣至喪明鄉黨感其志皆勸以撫子以守長子魁娃次子偏娃皆藉以成立氏年七十餘而沒

馮氏侯耀妻年二十一夫死子週歲夫弟先死弟婦他適子五歲氏并撫之所親或試以效弟婦所爲氏曰若改適則侯氏二子皆亡裡祀絕矣薄田數畝耕 自給以紡織績麻佐之督飭諸子讀書至於成立有孝行卒年六十一

張氏王包包妻年二十而包包亡子三歲家人欲嫁之氏覺三日不食遂不敢復逼紡織自給以撫子成立壽七十二

縣氏南鄉杜家坪杜蒼妻武生惠民之次女也幼有孝稱年十二歸蒼事翁姑得歡心姑歿

繼姑性嚴厲氏事之尤謹生能養死能哀蒼死氏年二十七子三長九齡幼在襁褓氏撫之
以慈教子以嚴稍有過不少貸諸子賴以成立氏善治家性好周急長子煥萃州庠生
張氏清廩生姚寶儲妻年十八寶儲死子樹生在襁褓氏辛苦萬狀鞠育成治家尤勤儉
守節二十七年

卷之十一終

天水縣志

卷之十一

三十二

蘭州國民印刷局排印

